



RÁITEAS AN CHATHAOIRLIGH AGUS ATHBHREITHNIÚ AN PHRÍOMHFHEIDH- MEANNAIGH

RÁITEAS AN CHATHAOIRLIGH



An Réamhrá

Is í seo an seachtú Tuarascáil Bhliantúil déag de chuid ÚMICÉ ('an tÚdarás'). Is cúis áthais dom í a chur faoi bhráid an Aire Fiontar, Trádála agus Fostaíochta, de réir alt 928(1) d'Acht na gCuideachtaí, 2014 ('an tAcht'). In Athbhreithniú an Phríomhfheidhmeannaigh, déantar achoimre ar na príomhghníomhaíochtaí a rinne an tÚdarás le linn 2022 chun a mhisean a chomhlíonadh. Tugtar níos mó sonraí faoi na gníomhaíochtaí sin sa chuid eile den Tuarascáil seo. Sa Ráiteas seo, tabharfaidh mé breac-chuntas ar an iomaí gníomh straitéiseach a rinne an bord agus ÚMICÉ i gcomhthéacs a shainchúraim chun maoirseacht a dhéanamh ar iniúcháireacht agus cuntasaíocht in Éirinn.

Fís agus misean

Le blianta beaga anuas, chaith ÚMICÉ súil arís ar a cháipéisí bunaidh, ina measc a sceideal ábhar atá forchoimeáda don bhord, a chuid luachanna, agus a chur chuige i leith an chlár oibre. I rith 2022, thug an bord agus foireann ÚMICÉ faoi athbhreithniú ar mhisean ÚMICÉ, agus rinne machnamh freisin ar an gceist ar cheart go mbeadh fís aige le haghaidh na gairme iniúcháireachta agus cuntasaíochta. Trí shraith ceardlann agus comhairliúcháin inmheánacha, shoiléirigh an tÚdarás a chuspóir féin agus d'fhaomh an bord an fís agus an misean nua go mall in 2022. Tá siad sin inár bhfoilseacháin ar fad anois, agus tugann siad treoir shoiléir don Údarás agus é i mbun a shainchúraim reachtúil. Anois agus an obair sin críochnaithe, déanfaidh an bord athbhreithniú ar an sceideal ábhar atá forchoimeáda don bhord in 2023 arís chun a chinntiú go bhfuil sé fós oiriúnach.

Caidreamh idirnáisiúnta

Lean an tÚdarás ag cur le feabhsú na cáilíochta iniúcháireachta lena phiaraí idirnáisiúnta laistigh de AE (mar chomhalta de CCEFI) agus go domhanda (le IFIAR). Tagann sé sin le straitéis ÚMICÉ a bheith rannpháirteach lenár bpiaraí domhanda, agus tugann sé deis fais agus forbartha freisin d'fhoireann ÚMICÉ.

Ar leibhéal na hEorpa, bhí Éire ina cathaoirleach ar thascfhórsa a rinne athbhreithniú ar rialachán agus treoir na hEorpa maidir le hiniúcháireacht. Ar deireadh, chuir CCEFI aighneacht chuimsitheach faoi bhráid an Choimisiúin inar leagadh amach na príomhthosaíochtaí a d'aontaigh rialálaithe, ina measc ról agus cumhachtaí breisithe do CCEFI chun comhleanúnachas na rialála ar fud na hEorpa a fheabhsú, chomh maith le baint aon bhacainní ar chomhroinnt eolais i measc rialálaithe, soiléiriú ar ról agus rialáil coistí iniúcháireachta agus tacaíocht bhreise do rialálaithe náisiúnta agus iad i mbun a gcuid oibre. Tugadh faoin obair sin ar dtús chun cur le hobair an Choimisiúin ar reachtaíocht na hEorpa a thabhairt cothrom le dáta. Ar an drochuair, tá an obair sin ar athlár anois ar feitheamh obair shuntasach a chur i gcrích ar leibhéal AE chun tograí inbhuanaitheachta a chur i bhfeidhm. Leanfaidh ÚMICÉ ag cur leis an obair sin, trína bhallraíocht sa ghrúpa comhairleach a threoraíonn obair CCEFI chomh maith leis na foghrúpaí ábhartha a thugann cúnamh praiticiúil do chomhaltaí.

Is comhalta de Bhord IFIAR é ÚMICÉ ar feadh téarma ceithre bliana ó 2021 go 2025. Bíonn meascán cruinnithe fíorúla agus fisiciúla i gceist le cruinnithe boird IFIAR, agus tá ÚMICÉ ina

chomhalta den Choiste Iniúcháireachta agus Airgeadais freisin. Ghlac foireann ÚMICÉ páirt i gceardlanna cigireachta agus forfheidhmithe in 2022, agus táimid ag súil le tosú ag freastal ar cheardlanna go fisiciúil arís in 2023. Bíonn tairbhe shuntasach ag an rannpháirtíocht sin do ÚMICÉ i leith rialáil gairme domhanda a fheidhmíonn de réir caighdeán domhanda.

Athruithe boird

D'éirigh Daniel Sinnott, ainmní na gCoimisinéirí Ioncaim, as mar stiúrthóir i rith na bliana agus tháinig Sandra Davey i gcomharbas air. D'éirigh Brendan Sheridan, ainmní an Bhainc Ceannais, as i rith na bliana freisin agus tháinig Eida Mullins i gcomharbas air. Ba mhaith liom buíochas a ghabháil le Daniel agus Brendan as an obair a rinne siad ar an mbord, agus fáilte a chur roimh Sandra agus Eida.

Tuairimí scoir

Is cinnte gur bhraith 2022 mar fhilleadh ar ghnáthchúrsaí oibre le haghaidh ÚMICÉ agus dóibh siúd lena bpléann sé. I measc na n-eintiteas a rialáimid, chomh maith leo siúd a n-oibrímid leo chun tacú le rialáil, eagraíodh teacht le chéile aghaidh ar aghaidh i mbliana nár tharla le fada. Níl aon amhras ach gur eascair athruithe suntasacha ar an gcaoi a n-oibrímid ar fad le chéile as na trí bliana seo caite, ach ag an am céanna léiríodh luach an teachta le chéile go fisiciúil nuair a bhíomar in ann sin a dhéanamh arís. Tá cothromaíocht le baint amach agus, ach oiread le heagraíochtaí eile, déanfaidh ÚMICÉ iarracht an cothromaíocht cheart a bhaint amach ina leith sin.

Chomh maith leis na dúshláin agus na hualaí a chruthaigh an tréimhse sin, ba spreagadh é freisin le haghaidh nuálaíochta, idir nuálaíocht theicniúil agus nuálaíocht phróisis. D'fhorbair ÚMICÉ a bheartas nuálaíochta féin ag a bhfuil tacaíocht ó aonad Forbartha Eagraíochtúla ar leith ach a spreagann a dhaoine. Dá bharr sin, tharla nuálaíocht ina ghníomhaíochtaí oibríochtúla agus tacaíochta araon, agus cabhraíodh le cultúr a chothú ina mbítear oscailte d'athrú agus smaointeoireacht nua laistigh de ÚMICÉ. Rinne an bord athbhreithniú ar bheartas nuálaíochta an Údaráis, agus tacaíonn sé leis, beartas a chuir ar chumas an Údaráis feidhmiú ar ardleibhéal i gcaitheamh na mblianta dúshlánacha seo caite.

Gach bliain ó thosaigh mé mar chathaoirleach ar bhord ÚMICÉ, tharla forbairt i rialáil iniúcháireachta agus cuntasaíochta agus ar chlú ÚMICÉ. Léiríodh tábhacht ár gcuid oibre le heisiúint na gcaighdeán iniúcháireachta le haghaidh na hÉireann,

tuarascálacha cigireachta iniúchóireachta, tionchar an Bhreathnaithe, forbairt ról ÚMICÉ ar an leibhéal idirnáisiúnta chomh maith lena ról fhadhbunaithe i maoirsiú na gairme cuntasaíochta agus athbhreithniú ar ráitis airgeadais eisitheoirí. Le blianta beaga anuas, chruthaíomar cainéil meán sóisialta chun cur le haimsiú lucht féachana ár gcumarsáide. Tagann sé sin lenár bhfís i leith mhuinín agus iontaobh an phobail as iniúchóireacht agus cuntasaíocht ar ardchaighdeán. Chun an iontaobh sin a chruthú i measc an phobail, caithfidh ÚMICÉ a bheith le feiceáil agus é i mbun a chuid oibre, agus éifeachtach ag cur torthaí na hoibre sin in iúl. Tabharfaidh ár bhfís nua treoir do ÚMICÉ agus é ag forbairt sna blianta amach romhainn.

Is mian liom aitheantas a thabhairt d'obair chrua mo chomhghleacaithe ar bhord ÚMICÉ i rith 2022. Feidhmímid ar bhealach dúshlánach ach measúil ina mbítear in ann na hábhair a mbíonn an bord freagrach astu a phlé go bríoch. Ba mhaith liom buíochas a ghabháil leis an Aire agus a chomhghleacaithe sa Roinn a thacaigh leis an Údarás agus é i mbun a chuid oibre agus lena gcothaímid caidreamh oibre an-dearfach, rud ar cheart aitheantas faoi leith a thabhairt dó. Tá ardmheas i gcónaí ag an mbord ar an bPríomhfheidhmeannach agus an fhoireann ceannaireachta a fhreastalaíonn ar chruinnithe boird freisin, agus déanaimid ár ndícheall tacú leo agus iad a choinneáil cuntasach freisin i gcaitheamh na bliana. Is mian liom chomh maith tréaslú le foireann ÚMICÉ a thugann faoina gcuid oibre go gairmiúil agus go héifeachtach, agus a bhí freisin ag croí na nuálaíochta a bhain leis na ráitis físe agus misin agus an clár nua oibre a fhorbairt, anuas ar ionadaíocht a dhéanamh ar ÚMICÉ in Éirinn agus go hidirnáisiúnta. Agus muid ag breathnú chun cinn chuig todhchaí inbhuanaithe agus na dúshláin agus na deiseanna ar fad a eascróidh as sin, táim muiníneach go mbeidh ÚMICÉ in ann a chion féin a dhéanamh ina iomláine.

Martin Sisk
An Cathaoirleach
25 Aibreán 2023



Chomh maith leis na dúshláin agus na hualaí a chruthaigh an tréimhse sin, ba spreagadh é freisin le haghaidh nuálaíochta, idir nuálaíocht theicniúil agus nuálaíocht phróisis. D'fhorbair ÚMICÉ a bheartas nuálaíochta féin ag a bhfuil tacaíocht ó aonad Forbartha Eagraíochtúla ar leith ach a spreagann a dhaoine.

ATHBHREITHNIÚ AN PHRÍOMHFHEIDHMEANNAIGH



An Réamhrá

Is é cuspóir an athbhreithnithe seo forléargas a thabhairt ar ghníomhaíochtaí an Údaráis in 2022. In 2022, tháinig ÚMICÉ chuig deireadh a chlár oibre trí bliana reatha, agus ag deireadh na bliana, de réir an Achta, ullmhaíodh clár nua agus cuireadh faoi bhráid an Aire é. Leagtar amach gníomhaíochtaí bliantúla ÚMICÉ i bplean gnó a thagann leis na straitéisí, na snáitheanna agus na háisitheoirí sa chlár oibre. Cinntíonn sé sin, chomh maith lenár n-oibleagáidí reachtúla a chomhlíonadh, go léiríonn obair ÚMICÉ fíis agus misean ÚMICÉ. Leagtar amach obair an Údaráis chun na spriocanna a luaitear sa phlean gnó a bhaint amach i bpríomhchorp na tuarascála seo. Pléitear freisin sa tuarascáil obair shonrach a rinneadh chun léargas níos iomláine a thabhairt ar an méid a dhéanaimid. Thugamar samplaí i mbliana freisin den chaoi a bhfuil an inbhuanaitheacht tar éis dul i bhfeidhm ar ÚMICÉ cheana féin, ó thaobh na rialála agus na hoibríochta de. Tugtar achoimre ghairid ar an obair sin i m'athbhreithniú.

Príomhghníomhaíochtaí

Eisíonn ÚMICÉ caighdeáin iniúcháireachta agus eiticíúla le haghaidh iniúcháirí reachtúla in Éirinn. Bíonn siad sin bunaithe ar chaighdeáin iniúcháireachta dhomhanda a eisíonn IAASB. Glacann FRC, rialálaí na Ríochta Aontaithe, na caighdeáin sin, agus féadfaidh sé leasuithe a dhéanamh. Is é beartas ÚMICÉ na caighdeáin a eisíonn FRC a mheasúnú i leith a gcomhlíontachta le dlí na hÉireann agus an Aontais Eorpaigh, agus i leith chomh hoiriúnach agus atá siad do mhargadh na hÉireann. Nuair is gá, leasaíonn ÚMICÉ na caighdeáin sula n-eisítear iad lena gcur i bhfeidhm in Éirinn.

In 2022, d'eisigh ÚMICÉ sé SIR, caighdeáin le haghaidh iniúcháirí a fheidhmíonn mar chuntasóirí tuairiscithe ar chiorcláin infheistíochta. Thug sé faoi chomhairliúchán freisin ar thograí chun CII600 maidir le hiniúcháireachtaí grúpa a athbhreithniú, agus bhí dul chun cinn maith déanta ar an obair sin faoi dheireadh na bliana. Mar chuid dá ghníomhaíochtaí ardaithe feasachta, sheol sé nuachtlitir agus sraith físeáin oideachais (a ndearnadh poiblíocht orthu ar na meáin shóisialta) ar chúrsaí tráthúla a bhain le caighdeáin iniúcháireachta.

Maoirsíonn ÚMICÉ gníomhaíochtaí rialála áirithe de na comhlachtaí cuntasaíochta forordaithe (CCFanna) ar fad, ina measc na comhlachtaí sin a aithnítear chun gur féidir lena gcomhaltaí cur isteach ar bhallaíocht i gclár na n-iniúcháirí reachtúla (CCAnna). Bíonn CCAnna faoi réir rialáil níos cuimsithí de réir reachtaíocht AE.

Tá cur chuige struchtúrtha ag ÚMICÉ i leith an chaoi a rialálann sé gníomhaíochtaí na gcomhlachtaí cuntasaíochta, agus in 2022 thug sé faoi shraith athbhreithnithe rialála ar an gcaoi a gceadúnaíonn agus a bhfaomhann na comhlachtaí sin a gcomhaltaí mar iniúcháirí. Anuas air sin, thug an tÚdarás faoi athbhreithniú téamach, in Éirinn agus ar fud AE trí CCEFI, ar thuiscint agus cur i bhfeidhm an cheanglais dea-cháile le haghaidh iniúcháirí faoi dhlí AE. Agus d'eisíomar treoirlínte maidir leis an gcaoi a dtugann comhlachtaí faoi dhearbhu cáilíochta a gcomhaltaí. Tá an tÚdarás ag obair faoi láthair ar threoirlínte maidir le faomhadh agus ceadúnú, agus súil aige iad a eisíúint in 2023.

Athbhreithníonn ÚMICÉ tuarascálacha corparáideacha eintiteas agus cistí liostáilte áirithe faoi Threoir an Aontais Eorpaigh um Thrédhearcacht, agus in 2022 scrúdaigh sé 32 tuarascáil bhliantúil agus trí thuarascáil leathbhliantúla. Ag eascairt as an ngníomhaíocht rialála sin, fuair sé gealltanais ó 15 eisitheoir, a thug 49 gealltanais san iomlán, a d'éiligh leasuithe ar a dtuairiscithe amach anseo. Tá sé de chumhacht freisin ag ÚMICÉ a éileamh ar eintitis fógraí ceartaitheacha poiblí a eisíúint, ina gcuirtear in iúl don mhargadh go raibh fadhbanna le tuarascálacha a gcreideann an tÚdarás a chaithfead a nochtadh. Eisíodh trí fhógra dá leithéid in 2022. Is réimse shuntasach rannpháirtíochta fós iad bearta feidhmíochta malartacha (i.e. tuairisciú ar fheidhmíocht nach bhfuil de réir agus/nó réitithe i gceart leis an bhfeidhmíocht mar a thomhaistear í faoi na caighdeáin tuairiscithe airgeadais). Ach d'aithin ÚMICÉ fadhbanna freisin a bhain le riosca inbhuanaitheachta agus athruithe aeráide, agus d'eisigh sé páipéar faoi sin i measc na bpáipéar a eisíodh in 2022. Ar leibhéal na hEorpa, chabhraigh ÚMICÉ le ESMA ina athbhreithniú ar dhréacht-Chaighdeáin Eorpacha um Thuairisciú Inbhuanaine a d'eisigh EFRAG.

Leanadh le cigireacht an Údaráis ar ghnólachtaí a dhéanann iniúcháireacht ar ELPanna in 2022. Rialálann ÚMICÉ seacht ngnólacht iniúcháireachta go díreach anois ar an gcaoi sin. Roghnaíonn ÚMICÉ sampla de bheartais ar fud an ghnólachta a bhaineann le cáilíocht iniúcháireachta de réir clár foriomlán a comhaontaítear lena phiaraí Eorpacha, agus déanann sé athbhreithniú freisin ar shampla de chomhaid iniúcháireachta ELP ar leith chun measúnú a dhéanamh ar an gcáilíocht iniúcháireachta i gcleachtas. D'athbhreithnigh an tÚdarás sampla de 35 comhad iniúcháireachta sna gnólachtaí sin i rith na bliana. Léiríonn torthaí na hoibre sin leibhéal sách ard (i gcomparáid leis na caighdeáin idirnáisiúnta) de cháilíocht iniúcháireachta, agus sonraíodh go raibh 89% díobh siúd a measúnaíodh ar chaighdeán maith. Mar sin féin, sainaithníodh roinnt fadhbanna i mbeartais ar fud an ghnólachta a fuair an rátáil thromchúiseach is airde. Eisíonn ÚMICÉ moltaí a chaithfead a chur i bhfeidhm laistigh de 12 mhí, agus mura gcuirtear i bhfeidhm iad osclaíonn sé cás forfheidhmíthe. I rith 2022, chuireamar fáilte ar ais roimh ár gcomhghleacaithe ó Stáit Aontaithe Mheiriceá, PCAOB, i ndiaidh bearna trí bliana.

Is é PCAOB a rialálann gnólachtaí áirithe toisc go ndéanann sé iniúchadh ar eintitis a liostaítear i SAM, ach caithfear an rialáil sin a dhéanamh i gcomhar le ÚMICÉ. Reáchtáil ÚMICÉ a sheisiún eolais don choiste iniúcháireachta i mí Dheireadh Fómhair, seisiún a tharlaíonn gach bliain anois. Leanamar freisin lenár gcuid oibre i measc an iliomad foghrúpaí agus tascfhórsaí ag CCEFI agus in IFIAR.

Ó thaobh an fhorfheidhmithe de, bhí an tÚdarás fós gnóthach in 2022. Cuireadh comhaontú socraíochta amháin i gcrích a bhain le mainneachtain CCF cloí le nósanna imeachta agus é ag tabhairt faoi imscrúdú ar cheann dá chomhaltaí. Ag deireadh na bliana, bhí ÚMICÉ ag fiosrú sé chás lena chumhachtaí faoi alt 934 den Acht. Léiríonn sé sin an líon is airde cásanna oscailte i stair an Údaráis. Táthar ag súil go dtiocfaidh comhaontuithe socraíochta as formhór na gcásanna sin. Rinne abhcóide forfheidhmithe sinsearach ÚMICÉ cur i láthair ag roinnt fóraim idirnáisiúnta faoi éachtaí ÚMICÉ mar rialála beag i gcásanna forfheidhmithe a chur i gcrích go sásúil.

Cuireann aonad seirbhísí corparáideacha ÚMICÉ raon feidhmeanna tacaíochta ar fáil don Údarás ionas gur féidir leis feidhmiú go héifeachtach. Éilíonn beartas oibre solúbtha ÚMICÉ córas slán TFC ardchaighdeáin agus táthar i mbun infheistíocht leanúnach chun a chinntiú go bhfanann sé sin amhlaidh. D'fhorbair an t-aonad beartais agus nósanna imeachta freisin chun an beartas oibre cumaisc faoina bhfeidhmíonn an tÚdarás anois a leabú tuilleadh. Sheol ÚMICÉ a shuíomh gréasáin nua ag deireadh na bliana, agus tá an t-aonad seirbhísí corparáideacha freagrach as slándáil agus cothabháil an tsuímh.

Sanntar freagracht as gníomhaíochtaí ilréimsiúla, nuálaíocht agus feabhas leanúnach ar an Aonad Forbartha Eagraíochtúla. Áiríodh le forbairtí 2022 straitéis nua folláine agus córais foghlama agus forbartha, agus comhtháthú breise ár gcuid luachanna inár n-obair leanúnach. D'fheabhsaigh ÚMICÉ a lorg ar na meáin shóisialta freisin, agus ábhar nua ar LinkedIn agus YouTube á bhforbairt ar fud an Údaráis. Thacaigh an t-aonad sin freisin le nuálaíocht inár bpróisis rialála agus oibríochtúla, agus stiúir sé forbairt fhís agus mhisean nua an Údaráis.

Tuairimí scoir

Leagtar amach sa chuid eile den tuarascáil seo raon iomlán ghníomhaíochtaí ÚMICÉ in 2022. Clúdaíonn sainchúram ÚMICÉ raon leathan gníomhaíochtaí rialála, a chumhdaíonn os cionn 40,000 cuntasóir, seacht gcinn de na gnólachtaí iniúcháireachta is mó sa tír agus beagnach 100 eintiteas corparáideach. Tugtar faoin obair sin ar fad de réir riachtanais dhlíthiúla agus bunaithe ar mheasúnú riosca sonracha chun tuairisciú corparáideach ar ardchaighdeán agus gairm chuntasach a chothú. Is ráiteas soiléir é misean nua ÚMICÉ ar a raibh ag croí obair an Údaráis i gcónaí.

Táimid ag feidhmiú anois i dtimpeallacht a d'athraigh go mór le trí bliana anuas. Cuirfidh riachtanais na hinbhuanaitheachta níos mó éiginnteachta agus dúshlán lenár gcuid oibre. Mar eagraíocht, déanann ÚMICÉ iarracht feidhmiú ar na leibhéil

cáilíochta is airde chun clú na hÉireann mar áit mhaith don ghnó a fheabhsú agus tacú leis. Aithnítear go forleathan go bhfuil timpeallacht rialála éifeachtach ar féidir brath uirthi ar cheann de na príomhghnéithe chun an clú sin a chothú. Is tírdhreacha idirnáisiúnta iad fiontraíocht agus rialáil, áit a gcaithfidh ÚMICÉ a bheith infheicthe agus éifeachtach. Feidhmíonn ÚMICÉ i dtimpeallacht tallainne atá thar a bheith iomaíoch freisin. Bíonn an-mheas ar ár ndaoine as a saineolas ach freisin mar gheall ar a ngairmiúlacht agus a gcumas feidhmiú ar an leibhéal is airde sa bhaile agus thar lear. Mar Phríomhfheidhmeannach, ar cheann de na príomhchúraimí atá agam tá eagraíocht a thógáil ina mbíonn rath orthu, bíodh is gur laistigh de pharaiméadair gníomhaireachta stáit ag a bhfuil líon beag comhaltaí foirne i gcomparáid le heagraíochtaí eile a dhéantar sin. Bhí ár gcumas iarrthóirí ardchaighdeáin a mhealladh chun folúntais a tháinig chun cinn san Údarás in 2022 a líonadh ar cheann dár n-éachtaí ba mhó a bhfuil mé bródúil astu. Tá an t-ádh ar ÚMICÉ go bhfuil foireann againn a léiríonn ár gcuid luachanna – neamhspleáchas, sármhaitheas agus ionracas – i gcaitheamh a gcuid oibre laethúla. Déanann siad ar fad i bhfad níos mó ná a bpost laethúil agus is mar gheall ar a ndíograis agus a dtiomantas siúd go bhfuil an cultúr nuálaíochta agus forbartha, idir phearsanta agus eagraíochtúil, leabaithe anois ar fud na hÉireann. Chomh maith leis sin, ba mhaith liom mo bhuíochas a ghabháil le bord ÚMICÉ a thugann faoi chúram casta le díograis agus críochnúlacht. Treisíonn ábhar na tuarascála seo dar liom go bhfuil rialáil na gairme i suíomh láidir agus folláin.

Kevin Prendergast
An Príomhfheidhmeannach
25 Aibreán 2023